

1 Pedro

Pedro 'ga, Jejui 'ga remimu'efera 'ga, 'awa ka'arana kwasiaa imonou Jejui 'ga rerowiaara 'gā nupe rakue. Jejui 'ga rerowiare'ema 'gā 'ga rerowiaara 'gā nerekou tyweaete. A'eramū Pedro 'ga ka'arana kwasiaa imonou 'ga rerowiaara 'gā nupe 'gā mu'akwaapa ee rakue. Janeruwarete 'ga 'Agesage ikwasiarukaa 'ga upe. A'eramū 'ga ikwasiia imonou 'gā nupe rakue.

1 Je Pedroramū ka'arana akwasiat imonou pē nupe. Je Jejui Kristu 'ga remimonoferamū. Ymā 'ga je monoi kwe pe ojemome'waukaa jee ikue. A'eramū je ka'arana kwasiaa imonou pē nupe. Pēē 'ā Jarejuwarete 'ga remiayuwa. Pē'wyr awi 'ā 'gā amū pē mokwasi'wau rakue. 'Awamū aje 'ā pejemogy pejekwasi'wau tekotee 'gā ywy pe. Pōtu ywy pe, Garasi ywy pe, Kapatosi ywy pe. Asia ywy pe, Pitini ywy pe. Mīmer imū 'ā pejekwasi'wau pe-jejemogyau rakue. A'eramū je ka'arana kwasiaa imonou pē nupe. **2** Ymā Janeruwarete 'ga pē pyyrūi ojeupe rakue. Wemifutar imū etee futat 'ga pē mū'jāu mama'eukwaaawa 'wyriara remiayuw awi. A'eramū 'ga 'Agesagea pē mogyaau Janeruwarete 'ga remiayuwamū, pē muesageu 'ga upe. "Agera 'gā je amū'ē teja'yra 'ga je'ega renuparamū", 'jau Janeruwarete 'ga pē nupe rakue. "Jera'yra 'ga amanū 'gā tywer are ako ikue", 'jau 'ga 'ā rakue. "A'eramū je Jejui Kristu 'ga ree je jemogypygyi tekou 'gā 'eramū je 'gā tywera moia 'gā nui", 'jau 'ga 'ā pē nupe rakue.

A'eramū je 'jau 'ga upe pē nee: “Eneresagea 'gā nerekoa je afutat, ki Ku'jyp. Emopy'ata'wa nanē ki 'gā imogyau”, 'jau je Jarejuwarete 'ga upe pē nee.

Pēku'i ki Jejui 'ga ree

³ “Ene te 'ā eneresage oree, sa'e ki Jejui Kristu 'ga Ruwarete 'ga upe, Jarejararete 'ga Ruwarete 'ga upe”, 'jau je pē nupe. 'Ga manū re 'ā Janeruwarete 'ga Jejui Kristu 'ga moferapa rakue nū. A'eramū nipo Janeruwarete 'ga wa'yrarete 'ga rerowiaaramū jane mogyau wa'yramū. Jane ree 'ga poriaa te nipo 'ga rerekou. A'eramū nipo 'ga jane mogyau wa'yramū, wa'yrarete 'ga rerowiaaramū. A'eramū jane a'eramū Jarejuwarete 'ga pyri jarejemogy rapesaka jarejemogyau. Jejui Kristu 'ga 'ga imoferapa. Jejui 'ga moferawe'em ire amunipo 'ā jane nanē niferawa'uweri nū. A'ere 'ā 'ga ferawi rakue. A'eramū jane “Jejui 'ga 'jawerimū etee futat jareferapa nū, 'ga jane moferapa jane rerawau ojepyri nū” 'e are jarejemogypykyka jarejemogyau. ⁴ A'eramū jane jarejeupe mama'e esagea 'ga imura rapesaka. Ojepyri jane oramū 'ga mama'e esage mua wemiayuwamū janee. 'Awamū futat 'ga janee wemimurama mÿina gatu ojepyri. Peu jane upe 'ga remimurama nateepawi. Peu nitywi futari jypemeruua, mama'e 'wara. Nitywi futari mama'e mote'ara. Ma'eramū 'ā 'ga imÿi gatui peu futat janee. ⁵ Werowiaaramū 'ga ojejukau jane ree. Wemifutar imū etee futat 'ga mama'eay resaukaa janee, ojee janejemogypygya resaukaawamū. 'Ga opājē mū jane momoirukare'ema ojewi. A'eramū nipo 'ur

ire Jejui 'ga jane rerawau ywag ipe jane mogyau ojepyri nakwaparimū warāu rūi futat. A'eramū nipo Janeruwarete 'ga jane upe wemimŷi gatufera mua janee. A'eramū nipo 'ga jane mueapyou jarejeupe wemiapofer are.

⁶ 'Awamū nipo mama'eaya jesaukari pē nupe kwaiwete. A'eramū nipo peje'arasigamū pejejemogyau. A'ere 'ga pyri pejeo are pēnea'at pejeku'iramū pejejemogyau. ⁷ Mama'eay upe pēnuagamū pē nesakara 'gā 'jau: "Na pa je ra'e. Werowiat 'gā Jejui 'ga a'jea futat. Nopoiri futari 'gā 'ga wi ojeupe mama'eay jesaukaramū miamū", 'jau nipo pē nesakara 'gā. Sā'ā ourua. Itarewara 'ga 'ā ita rapyau ouru resakawamū. Nan tee futat Janeruwarete 'ga mama'eay resaukari pē nupe ojee pejemogypyga resaukaawamū. "Tae-sak tejerowiaararete 'gā amū 'jau kwy", 'jau 'ga ojeupe, mama'eay resaukaa janee. Ojeupe mama'eay jesaukaramū 'ga rerowiaraipara 'gā poiri 'ga rerowiar awi. A'ere 'ga rerowiaararete 'gā nopoiri futari 'ga wi. Wuagamū etee futat jupe. Mama'eay upe pejejuagamū pē ū pejejemogypyka etee te Kristu 'ga ree. A'eramū 'gā amū pē momoirukare'ema 'ga rerowiar awi. Ouru 'ā epy ete numiamū. A'ere anure ourua mi-amū teepawamū. A'ere Jejui 'ga rerowiaaramū jane nanarūi. 'Ga etee te erowiararamū nitywi futari 'ga rerowiar awi pē momoirukaara 'ga amū. A'eramū nipo Janeruwarete 'ga, Jejui 'ga ruaw ipe, 'jau pē nupe: "Jera'yrarete 'ga perowiat nanimenime. Nepepoiri futari 'ga rerowiar awi pejejeupe mama'eay jesaukaramū miamū. A'eramū pē ū pejejesageramū jee", 'jau nipo 'ga

pẽ nupe. A'eramũ 'ga pẽ monou ojepyri nakwaparimũ warãu rãi futat, pẽ pojeuwukaa oje'jawe 'gã nupe.

⁸ Nepeesagi agawewi Jejui 'ga rakue. A'etea pêporomutat 'ga ree. 'Awamũ nanẽ 'ã pẽ 'ga resake'ema nã. A'etea perowiarete 'ga. A'eramũ pejeku'iramũ pejejemogyau 'ga ree. Saa'e ywagipewara 'gã ku'ia 'ga ree. Nan tee futat pêku'i 'ga ree. ⁹ Ma'eramũ sipo pêku'i pejejemogyau 'ga ree? Jejui 'ga perowiat nanimenime pejejemogyau. A'eramũ 'ga pẽ katu'oka. Anure nipo 'ga pẽ mogyau ojepyri nakwaparimũ rãi. A'eramũ ki pêku'i pejejemogyau.

¹⁰⁻¹¹ Ymã, Jejui 'ga rure'emaewe, Janeruwarete 'ga je'ega mome'wara 'gã Jejui Kristu 'ga rura mome'ui ojepyriwara 'gã nupe rakue. Janeruwarete 'ga 'Agesagea 'gã mu'akwaawukaa'i 'ga rur are. A'ere 'gã naeapyoi katui ee. A'eramũ 'gã 'jau: "Anure nipo Janeruwarete 'ga 'ga amã muri ae katu'okawamã. A'eramũ nipo 'ga rerowiare'ema 'gã 'ga rerekou tyweaete, 'ga jukau. A'ere nipo 'ga manã re Janeruwarete 'ga mama'e esage apoi 'ga upe", 'jau 'gã nakue. A'ere 'gã naeapyoi katui ee. Nokwaawi nanẽ 'gã Kristu 'ga ruawa nã. A'eramũ 'gã oporokwaawiweramã ee. "Maranime sipo Janeruwarete 'ga 'ga muri?" 'jau 'gã ojeupe. "Maran sipo 'ga ruri?" 'jau 'gã ajemogyau. A'ere 'gã naeapyoi katui 'ga ree. ¹² "Pejejeupe jeremimome'ufera pemome'u 'gã nupe", 'jau Janeruwarete 'ga oje'ega mome'wara 'gã nupe rakue. "Na'awamã ako ma'eramã pẽ nupe rãi je 'i aipo 'jau. Anure ojeup ma'eramã 'gã nupe ijeaporama te je

amome'u pē nupe. A'eramū ojeapowe'em pē nekoramū", 'jau 'ga 'gā nupe rakue. 'Awamū 'ā 'gā amū awau Jejui 'ga mome'wau pē nupe rai'i. Ymā Janeruwarete 'ga U'agesage muri ywag awi janee ikue. A'eramū 'ga 'Agesagea 'awamū Jejui 'ga mome'waukaa 'gā nupe pē nupe. Ywagipewara 'gā 'ā weapyoweramū Jejui 'ga mome'u are numiamū. A'ere 'gā 'ā naeapyoi futari ee. "Najereapyoi je Jejui 'ga remiapofe are", 'jau 'gā 'ā ojeupe.

Pepoir iki mama'e ekoete apo awi

¹³ Janeruwarete 'ga pē katu'oka wa'yra 'ga pēē erowiaramū. A'eramū ki pēē pejepoia mama'e ekoete apo awi. 'Ga remifutar imū etee futat pēē mama'e apou. Pēnea'at kasi mama'e ekoete apo are ne. Pejejea mÿina 'ga ree. Pejejemogypykyka etee ki pejejemogyau 'ga rur are. Anure nipo, Jejui Kristu 'ga ruaw ipe nipo Janeruwarete 'ga mama'e esage monoi pē nupe. Aipoa ki peapesak pejejemogyau. ¹⁴ Jarejuwarete 'ga ra'yramū pejemogy. A'eramū ki pēē 'ga je'ega renupa katu katu pejejemogyau. 'Ga rerowiare'ema ako pēē mama'e apou pejejemogyau pejejemifutar imū etee ikue. A'ere kasi 'awamū peapo mama'ea pejejemifutar imū etee pejejemogyau ne. ¹⁵ Jarejuwarete 'ga remifutar imū etee ki 'awamū mama'ea peapo. Ymā te 'ā 'ga pē mū'ëi mama'e tywera apoara 'gā nui, pē mogyaw wemiayuwamū rakue. Nuapoi futari 'ga mama'e tywera. Niparuapoweri nanē 'ga mama'e tywer are nū. Mama'e esagea etee 'ga iapou. A'eramū ki pēē pejejemogyau esage 'ga 'jawe. ¹⁶ Ymā te 'ā Janeruwarete 'ga ka'arana

kwasiarukari Moisesi 'ga upe rakue: "Naapoi futari je mama'e tywera. A'eramū ki pēē pejejemogya esage je 'jawe. Pēē nanē mama'e tywera apowe'em nū, je 'jawe nū", 'jau 'ga ikwasiarukaa 'ga upe rakue.

17 Jarejuwarete 'ga jane enūina, Kiapi'ni, 'jau jane 'ga upe. 'Ga 'ā ojejuka pāwē pāwē jane ree. A'eramū 'ga anure jane mepyau janeremia pofer are. Mama'e tywera apoara 'gā 'ga erekou tyweaete. Mama'e esage apoaramū 'ga jane rerekou esage. A'eramū ki pēē pejejemogya esage etee, 'ga pojeupa, 'ga pyri pejewawe'ēwe futat. **18-19** Ymā te 'ā Jane jemogy ekoetei tee rakue, ymāwarera jareypy 'eawer imū etee rakue. A'ere Jane 'awamū "Jejui 'ga janetywera omepy, Jane mū'jāu mama'e tywera apoara 'gā nui" 'e kwaawi. Ma'ja pyu sipo 'ga janetywera mepyī? Ouru pyu sipo 'ga imepyī? Naani. Prata pyu sipo 'ga imepyī? Naani. Jejui 'ga 'ā amanū janetywera mepyau rakue. Anure ouru, prata, mīmera miamū teepawamū etee futat. A'ere Jejui 'ga te 'ga manūi janetywera mepyau 'Uwarete 'ga upe janee. Sā'ā ore judeuramū karupa'mī jukaa wy reko'woga orotywera mepyawamū ikue. Karupa'mī esagea etee ore ijukau 'ga upe. Karupa'mī teua ore narajukaa'uweri iapyawe'em Jarejuwarete 'ga upe. Nan tee futat Jejui 'ga ojejukaukaa 'gā nupe, owy reko'wogukaa 'gā nupe janetywera mepyawamū rakue. 'Ga etee te 'ā esageay ma'ea. A'eramū 'ga etee futat janetywera mepyarūmū. Epy ete te 'ā janetywera repya, karupa'mī repy apyraapa.

20 Ymā te 'ā Janeruwarete 'ga ywy apoe'emaewe, Jejui 'ga pyrūi janetywera

mepyawamū rakue. 'Awamū futat aje 'ā 'ga 'ga muri ywy pe pē poaawamū rai'i. A'eramū 'ga 'ga kwaawukaa pē nupe rai'i. ²¹ Janeruwarete 'ga 'ā 'ga moferapa, 'ga mogou 'ga mÿina 'wyriaramū janee. A'eramū 'ā pēē Kristu 'ga ree Jarejuwarete 'ga rerowiaa pejejemogyau. Kristu 'ga ree pejejeupe Jarejuwarete 'ga remiaporama rapesaka pejejemogyau.

²² Jejui 'ga je'ega peenup katu katu pejejemogyau. A'eramū pēē pejepoia mama'e tywera apo awi, pejejekatu'oka 'ga upe. A'eramū pēē pejeporomutaramū Jejui 'ga rerowiaaramū pejejuee. A'eramū ki pēē 'awamū taetu pejeporomutaramū pejejuee. ²³ Sā'ā ae kūima'eramū ae ja'yrapya. A'eramū 'ā u'ar ire kunumīa ajemogyau ta'yriara 'ga ra'yramū. A'ere 'ā anure tuwa amanūmū etee jui. A'ere nanarūi Janeruwarete 'ga rekoi janeruwamū. Namanūi futari 'ga. 'Ga je'ega nanē ateepawe'emamū nū. A'eramū 'ga oje'ega pēē erowiaramū Janeruwarete 'ga pē moygau wa'yramū oje'jawe. ²⁴ Ymā Janeruwarete 'ga ka'arana kwasiarukari Isai 'ga upe rakue:

“Sā'ā 'ywotyra.

A'eramū 'ā ipotyra kamēsīete te futat opÿijagamū. Kamēsīete te futat 'ā ipotyra u'aa o'yw awi.

Nan tee futat aea.

Kamēsīete te ae pawi.

²⁵ A'ere Janeruwarete 'ga je'ega nateepawi futari", 'jau 'ga ikwasiarukaa 'ga upe rakue.

Aipoa 'ga je'ega a'jea futat. Pē nupe Jejui 'ga ree morogyta esage mome'uramū 'gā aipoa 'ga je'ega futat 'gā imome'wau pē nupe.

2

Pejemu'e ki Jejui 'ga ree

¹ 'Ga je'ega renuparamū pēē pejejekatu'oka pejemogyau 'ga upe. A'eramū ki pēē a'eramū pejepoia mama'e tywera apo awi. Pē'me kasi ne. Pejuerekoay kasi mama'e are ne. Pejakurap kasi ne. Peapo kasi mama'e tywera ne. ² Kunumīakyra 'jawe ki pejemogy. Sā'ā kunumīakyra 'gā oy kamy uwejuweja. Nan tee futat ki pēē. Pejemu'e ki 'ga je'eg are au'jeteramū. Oy kamy are kunumīakyra 'gā opifuakaramū ajemogyau. Nan tee futat pēē 'ga je'ega renuw ire pejemogyau 'ga rerowiaarareteramū. 'Ga je'ega wesageramū etee futat pē nupe. Nitywi futari mama'e tywera ipype. A'eramū ki pēē 'ga je'eg are pejemu'eweramū pejemogyau. 'Ga je'eg are etee pejemu'e re 'ga remifutara kwaapa pejemogyau. ³ Ymā Janeruwarete 'ga ka'arana kwasiarukari 'ga amū upe rakue. "Janejararete 'ga esage", 'jau 'ga ikwasiarukaa 'ga amū upe rakue. Janeruwarete 'ga pē katu'oka rakue. A'eramū pēē "Janejararete 'ga esage" 'e kwaapa.

⁴ Jarejuwarete 'ga perowiat rakue. A'eramū ki 'awamū taetu pēē 'ga rerowiaa pejemogyau. 'Oga apoara 'jawe Janeruwarete 'ga. Sā'ā 'oga apoara 'gā 'yw esagea etee imū'ěa tupaa'mywareteramū. 'Yw esagea etee nanē 'gā erawau inuga tupaa'mywamū. Itaoga apoara 'gā nanē ita esagea etee imū'jāu nū. A'eramū 'ā itaoga apoara 'ga ita amū monou imomoa ojewi. Aipoa ita nia'wyri 'gā nupe. Nan tee futat judeuramū ore'wyriara 'gā Jejui 'ga reroyrūmū.

A'eramū 'gā 'ga jukaukaa jefaruu 'gā nupe ikue. A'ere Janeruwarete 'ga 'gā nemiroyrūmera 'ga mogoi 'wyriaramū wemiayuwamū janee. “Esage 'ga. A'eramū je 'ga mogou 'wyriarareretamū orojemiyuwa 'gā nupe”, 'jau 'ga rakue. ⁵ Itaoga apoara ita esage etee imū'jāu wog are. A'eramū 'ga imÿina tenaw ipe te tee. Nan tee futat Janeruwarete 'ga pē mū'jāu wemiayuwamū. A'eramū ki pēē pejejemogyaukaa 'ga upe 'ga remifutar imū etee futat. Ymā judeuramū ore mama'e rerooi mainana 'gā nupe ikue: “Emono Jarejuwarete 'ga upe jee”, 'jau ore erawau 'gā amū nupe ikue. Mainana 'gā etee te oporowyky 'ga upe ikue. A'ere jane 'awamū jane jemogyi mainana 'jawe 'ga upe. Kristu 'ga rerowiaaramū jane juejue etee futat saporowyky 'ga upe. Ymā 'ã judeuramū ore orojeymawa monou 'ga upe rakue. A'ere jane 'awamū jane jemogyi 'ga upe oporowyky ma'eramū. “Ga 'Agesage pājē mū je mama'e apoi 'ga upe, 'ga muorypa”, 'jau pēē 'ã 'awamū. Jejui Kristu 'ga 'ã pēē erowiaa pejejemogyau. A'eramū nipo Janeruwarete 'ga 'jau pē nupe: “Esage 'gā porowykyaa jee”, 'jau nipo 'ga pē nupe. ⁶ Ymā te 'ã Janeruwarete 'ga oje'ega kwasiarukari ka'aran are Isai 'ga upe rakue:

“Sā'ã itaoga apoara 'gā.

Itapewuu renuēma jui.

A'eramū 'ã 'ga aipoa ita monou imojypa iypy pe.

A'eramū 'ã aipoa ajepeja ita koka imotypa.

A'eramū futat 'ã aku'jawe'em. Nan tee futat je tejemimono 'ga monoi Sião 'jaw ipe,* 'ga

* **2:6** Siãoa Jerusarega rer irū.

rerowiaara 'gã nupe a'eraamũ futat nipo.
 A'eraamũ futat nipo 'ga rerowiaara 'gã
 aku'ipawe'emamũ futat 'ga ree",
 'jau 'ga ikwasiarukaa 'ga upe rakue.

⁷ Jejui 'ga rerowiaaramũ pẽõ 'jau: "Ita esage
 'jawe 'ga", 'jau pẽõ 'ga upe. A'ere nipo 'ga
 rerowiare'ema 'gã naporomutari 'ga ree. Ymã te
 'ga amã ka'arana kwasiari 'ga ree rakue:
 "Itaoga apoara 'gã weroyrã amã itaa numiamã.
 Nia'wyri aipoa itaa 'gã nupe. A'ere ajepeja 'ga ruri
 'gã nemiroyrãmera ita pyyka imonou 'oga
 ypykokaramã",
 'jau 'ga ikwasiaa rakue.

⁸ Anure Isai 'ga ikwasiaa ee nã:
 "Aipo ita are nipo kwaiwete 'gã 'ari.
 Aipo ita 'gã netygukaa",
 'jau Isai 'ga ikwasiaa rakue.

Nan tee futat nipo Jejui 'ga rerowiare'ema 'gã je-
 mogyi ita are u'at ma'e 'jawe. Niporenuwiweri 'gã
 'ga mome'u are. Niparuerowiariweri 'gã Jejui 'ga
 ree. A'eraamã 'gã ojereko tywerukaa Janeruwarete
 'ga upe. Nan Janeruwarete 'ga jane rerekoi Jejui
 'ga mome'u are janeporenawiwere'emamã. Ymã
 we futat 'ã Janeruwarete 'ga 'i rakue: "Teja'yra
 'ga rerowiare'ema 'gã je areko tywet", 'jau 'ga 'ã
 ojeupe rakue. A'eraamã 'ga wemifutar imã etee
 futat 'gã nerekou tyweaete.

⁹ A'ere nanarã Kristu 'ga rerowiaaramã jane.
 Ymã we Janeruwarete 'ga jane mã'jãu 'gã nui, jane
 mogyau wemiayuwamã. Janeruwarete 'ga futat
 'ã jane 'wyriararereteramã. Ojeupe oporowyky
 ma'eraamã 'ga jane mogyau. Wemiayuwamã futat
 'ga jane mogyau. Janeruwarete 'ga kwaapare'ema

'gā ypytunimū wata ma'e 'jawe. 'Gā nui futat 'ā 'ga jane mū'jāu jane mogyau okwaaparamū. A'eramū 'ā jane jarejemogyau 'arimū wata ma'e 'jawe mama'e apou 'ga remifutar imū. 'Ga jane mū'jāu 'gā nui wemiapofera mome'waramū. Janeruwarete 'ga esage. "Mama'e esagea etee 'ga wapo" 'e mome'waramū 'ga jane mū'jāu mama'e tywera apoara 'gā nui. ¹⁰ Ymā te 'ā pēē na'ga remiayuwa rūi rakue. A'ere 'awamū pejemogy 'ga remiayuwamū. Ymā te 'ā pēē "Janeruwarete 'ga ajemuaēm jane ree" 'ea nepekwaawi pejejemogyau rai'i. A'ere pēē 'awamū pejemogy 'ga remiayuwamū. A'eramū pēē "Janeruwarete 'ga ajemuaēm jane ree" 'e are pejejeapyoramū pejemogyau.

Janeruwarete 'ga remiayup

¹¹ Pēē 'ā jejekoty'aawaretea. A'eramū je pē mu'akwaapa mama'e are. Napejeje'wyr ipe rūi pejemogy. Tekotee 'gā 'wyr ipe te pejemogy ra'ne. 'Au 'ā jane jemogyi kwaparimū warāu etee futat. Ywag ipe oo ma'eretea te jane. Aipoa te jane'wyraretea. A'eramū ki pēē mama'e tywera apowe'em pejejemifutar imū etee ne. Pejejemifutar imū etee mama'e apo re pēē mama'e tywera peapo pejejemogyau ne. ¹² A'ere ki pejemogy esage Jarejuwarete 'ga rerowiare'ema 'gā pype. "Mama'e tywera 'gā wapo", e'i futatee agawewi nipo 'gā pē nupe. A'etea ki pejemogy esage 'gā pype, mama'e esagea etee iapou pejejemogyau 'gā pype. A'eramū 'gā pejemogy esage resaka. A'eramū nipo 'gā 'jau: "Na pa je ra'e. Ajemogy esage 'gā", 'jau nipo 'gā ojeupe. A'eramū nipo

'gā anure Jarejuwarete 'ga muorypa pē nee. 'Ga rowase jarejatykaaw ipe nipo 'gā 'jau: "Ene te 'ā eneresage. Ejerowiaara 'gā eremogy esage jepi", 'jau nipo pē nee i'me ma'efera 'gā Jarejuwarete 'ga upe.

¹³⁻¹⁴ Pēē 'ā Jarejararete 'ga rerowiaara. A'eramū ki pēē peje'wyriara 'gā je'ega nanē enupa pejejemogyau nū. Aipoa Janejararete 'ga amuekōēāi. Pē'wyriara 'ga nipo 'gā amū mŷina 'wyria'riramū pē nupe opoaawamū. "Mama'e tywera apoara 'gā nupe tereje'eg jee 'jau", 'jau 'ga 'gā amū nupe. "Mama'e esage apoara 'gā nupe nanē ene eje'ega nū. 'Mama'e esagea peapo', pe'je ki mama'e esage apoara 'gā nupe jee", 'jau nipo 'ga 'ga upe. A'eramū ki pēē 'wyria'ri 'ga je'ega nanē enupa nū. ¹⁵ Jare'wyriara 'gā je'ega renupa nanē jane Jarejuwarete 'ga remifutararete apou. 'Ga remifutar imū etee janejemogy resag ire jane resakara 'gā i'me ma'e 'gā je'ega rerowiare'ema ajemogyau. A'eramū futat nipo i'me ma'e 'gā o'meu'jawe'emamū janee. ¹⁶ Nitywi futari mama'ea pē nupe iapoukaara 'gā amū. Pēē tee futat mama'ea peapo pejejemifutar imū etee futat. A'ere Janeruwarete 'ga janejararetea. A'eramū 'ga pē mū'jāu mama'e tywera apoara 'gā nui. A'eramū ki pēē pejejewyre'ema mama'e tywera apo upe. Jarejuwarete 'ga remifutar imū etee futat ki pēē mama'e apou pejejemogyau. ¹⁷ Pejejuka esage pāwē pāwē ki pejejuee. Pejeporomutaramū Jejui 'ga rerowiaaramū pejejuee. Peje'wyriara 'gā ki pepojeup. Jarejuwarete 'ga taetu pēē ipojeupa.

¹⁸ 'Ga amū upe pejeporowykyau ki pejejerekwara 'ga je'ega peenup. Pēnerekwara 'gā amū

nipo opota'waramū pē nee. A'eramū pēē 'gā je'ega taetu enupa etee. Pēnerekwaramū nipo pē nerekou tyweaete agawewi. A'etea peje-porowykyau esage ete futat pejejemogyau 'gā nupe. ¹⁹⁻²⁰ Pejejereko tyweara 'gā je'ega pēē enuwete re Janeruwarete 'ga mama'e esage apoi pē nupe ee. "Je rerekro tywerete agawewi nipo 'gā amū. A'etea je 'ga je'ega aenuw ete futat tekou", pe'je ki. Aipoa Janeruwarete 'ga afutat. A'eramū ki pēē pejejuagamū jupe. Jupe pēnuag ire Janeruwarete 'ga mama'e esage apou pē nupe ee. Mama'e tywera apo are pejejereko tywera upe pēnuagamū Janeruwarete 'ga nuapoi mama'e esagea pē nupe. Pēē tee futat pejejereko tywerukaa pejerekwara 'ga upe. Mama'e esage pēē iaporamū nipo 'gā pē nerekou tyweaete 'eramū te Janeruwarete 'ga jejukai pē nee, mama'e esage apou pē nupe ee. ²¹ Pejerekro tywer ekoete upe pēnuaga Janeruwarete 'ga ifutaa.

Jejui Kristu 'ga 'ā mama'e esage etee agawewi wapo. A'etea 'gā 'ā wereko tywerete 'ga. Jane-tywera mepyawamū 'ga 'ā ojerekro tywerukaa 'gā nupe. A'eramū ki pēē 'ga 'jawe futat pejejemogyau. ²² Nuapoi agawewi futat 'ga 'ā mama'e tywera. Ni'mei 'ga nanē nū. ²³ Okurawamū mi-amū 'ga 'gā kurape'ema. Wereko tywereteramū miamū 'ga ojepyke'ema 'gā nee: "Je rerekro ty-wet pejepe. A'eramū je pē nerekou tyweaete", 'jawe'em 'ga 'gā nupe. 'Uwarete 'ga ree etee 'ga jemogypygyi. "Jeruwarete 'ga te nipo 'gā wereko 'gā nemiaopofer are", 'jau etee 'ga ojeupe 'Uwarete 'ga ree ojemogypygyka. A'eramū ki pēē pejejemogyau 'ga 'jawe futat. ²⁴ 'Ypeywar are omafu'amamū

Jejui Kristu 'ga janetywera mepyau. Na'ga tywer are rūi 'gā 'ga rerekou tywet. Janetywer are te 'gā 'ga rerekoy tyweri. Aipoa 'ga iapou janetywer awi jane mueateeawamū. Jane katu'okawamū 'ga manūi janetywera mepyau. 'Ga manū enune 'gā 'ga mopimopika. Omopig are 'ga jane katu'oka janejero'wu awi. ²⁵ Ymā 'ã neperowiari Jejui 'ga rakue. Jejui 'ga rerowiare'ema 'gā karupa'mī ka'jama 'jawe. Sā'ã karupa'mī ka'jama. A'eramū 'ã oka'jam ire karupa'mīa ojewyre'ema ojetee. A'eramū 'ã ijara 'ga awau weymawa recaa. We-sag ire 'ã awau 'ga rewiri nū. Nan tee futat 'ã pēē nakue. Oka'jam ma'e 'jawe pejemogy. A'ere 'awamū Jejui 'ga pē nekari pē nerawau ojeupi 'Uwarete 'ga rape rupi.

3

Imen ma'e

¹⁻² 'Awamū je imen ma'eramū pē mu'akwaawi pejemogy are. Pejemena 'gā je'ega ki peenuw ete. Amumeramū nipo pēmena Jejui 'ga rerowiare'ema. A'ere ki pejemogy esage. A'eramū nipo 'gā pejemogy esage resaka 'gā nanē Jejui 'ga rerowiaa nū. Jejui 'ga nipo pēē imome'wawe'em agawewi 'gā nupe. A'etea nipo 'gā Jarejuwarete 'ga rerowiaa pejemogy esage resag ire. ³ "Tajemokaturam wā nupe 'jau kwy", 'jau nipo pēē pejejeupe. Maran sipo Jejui 'ga rerowiaaramū kūjānamū pejejekatu'oka 'gā nupe? Taity esage munewa sipo pē katu'ok? Pejewaga munewa sipo pē katu'ok? Pejeakagawirywa sipo pē katu'ok? Naani. Pejejewaga pyu pejekatu'oka sipo pē katu'ok? Naani. ⁴ Pēneko esagea etee pē

katu'ok pẽ moyau a'jea futat. Pejemuawapira te pẽ katu'ok pẽ moyau. Pejejuee pejepota'wa nanẽ pẽ katu'ok pẽ moyau nũ. Aipo kūjā esage ajemogyau Jarejuwarete 'ga upe. Nateepawi futari ëẽ resagea 'ga upe. ⁵ Ymã kūjā 'gã amũ Jarejuwarete 'ga rerowiari nanimenime rakue. "Anure nipo Janeruwarete kiā je rerooi ojepyri", e'i 'gã ojeupe rakue. Poromũ 'gã omena 'gã je'ega renuwi etee rakue. Nan 'gã jekatu'ogi Jarejuwarete 'ga upe rakue. ⁶ Sã'ã Sara ëẽ rakue. Omena 'ga je'ega ëẽ enupa ete, Abraão 'ga je'ega ëẽ enupa ete rakue. "Je Ku'jyp", 'jau ëẽ 'ga upe rakue, 'ga pojeupa rakue. A'eramũ ki pẽẽ ëẽ 'jawe pejepamogyweramũ pejepamogyau esage. Mama'e awi nanẽ pejekyjawe'em nũ. A'eramũ nipo pejepamogyau Sara ëẽ ra'yra 'jawe.

Emireko ma'e

⁷ 'Awamũ je emireko ma'eramũ pẽ mu'akwaawi pejemogy are. Pẽnemireko 'gã nifuakari pẽ 'jawe. A'eramũ ki pẽẽ pejepamireko 'gã nerekou esage. Pejejukau esage 'gã nee. Anure nipo Jejui 'ga pẽ nerooi pẽ moyau ojepyri. Pẽnemireko 'gã nanẽ 'ga rerowiaa nũ. A'eramũ 'ga pẽnemireko 'gã nanẽ erawau imogyau ojepyri nakwaparimũ rũi nũ. A'eramũ ki pẽẽ 'gã nerekou esage etee futat. Kasi a'e pe Janeruwarete 'ga nuenuwi pẽje'ega ojeupe peje'egamũ ne.

Pejepyk kasi 'gã nee ne

⁸ Ka'arana kwasiapawe'emaufe je pẽ mu'akwaawi pãwẽ pãwẽ, kūima'eferamũ, kūjāmeramũ 'jau. Majepai 'yweteewara 'jawe ki pejemogy. Pejepota'waramũ pejepotue. Jejui

Kristu 'ga ree pejejemogypyky pejejemogyau. A'oramū pēē pejejemogyau pejejoptuna 'jawe. A'oramū ki pēē pejeporomutaramū pejejuee. Jejui 'ga rerowiaaramū ae ojoptuna tee te 'jawe futat. A'oramū ki pejepota'waramū pejejuee. Pejejopoaa mama'e are. Pejerowiaraip kasi pejejee ne. ⁹ Pejepyk kasi 'gā nee ne. Pejejeupe mama'e tywera 'ga amū iaporamū kasi mama'e tywera peapo 'gā nupe ne, pejejepyke'ema 'gā nee. Mama'e esagea etee ki peapo 'gā nupe. 'Gā amū nipo pē kurapa. A'ere kasi pekurap 'gā ne. Pejekuraw ire pejeporogytau esage etee 'gā nupe, pejemara'nemamū 'gā nee. Mama'e tywera apoara 'gā nui pē mū'ē re nipo Janeruwarete 'ga 'jau pē nupe: "Mama'e esagea taapo pē nupe 'jau", 'jau 'ga pē nupe wemiayuwamū pē mogyau. A'oramū ki pēē mama'e esagea etee iapou pejejaupe. ¹⁰ Ymā te Janeruwarete 'ga ka'arana kwasiarukari aipo are 'ga amū uperakue:

"Pejejekōēäiweramū ki peojet pejejuago'o awi.

Peje'eg tywet kasi pejejaupe ne.

Au'je ki pē'me re.

¹¹ Au'je ki mama'e tywera peapo re.

Mama'e esagea etee ki peapo.

Pejepota'waramū etee pejejemogyau pejejuee.

¹² Janejararete 'ga ojejuka esage mama'e esage apoara 'gā nee.

Ojeupe 'gā je'egamū 'ga mama'e esage apoara 'gā je'ega renupa.

A'ere 'ga mama'e tywera apoara 'gā noopoari", 'jau 'ga ikwasiarukaa 'ga amū uperakue.

¹³ Mama'e esagea pēē iapo re sipo 'gā pē nerekō tyweri ee? Naani. Pē nerekō tywerete ekoete te 'gā. Napēnemīapo esage are rūi 'gā pē nerekō tyweri. ¹⁴ A'ere ki pēku'i etee pejejemogyau ee 'gā amū pejejereko tyweramū mama'e esage apo are. Janeruwarete 'ga mama'e esagea wapo ee pē nupe. A'eramū ki pejekyjawe'em pejejereko tyweara 'gā nui. Pēpy'a'wyt kasi 'gā nee ne. ¹⁵ Pejemogypyyk 'ā Kristu 'ga ree. 'Ga 'ā pējararetea. A'eramū ki pēē 'ga muorypa, 'ga je'ega renupa. 'Ga amū nipo oporonupa ee: "Ma'eramū pēē pejejemogypykyka Jejui 'ga ree?" 'jau nipo 'gā pē nupe. A'eramū ki pēē 'gā mueapyou ee. ¹⁶ Pejeporogytau esage etee 'gā nupe. 'Gā nupe imome'uramū kasi pemue 'gā ne. A'eramū pēē mama'e esagea etee iapo re pēē pejejenosōue'em pejejemiaföfera renosōue'em. Pejemogy esage. A'eramū nipo "Kristu 'ga rerowiaara 'gā mama'e tywera etee wapo" pē nupe 'jara 'gā ojenosōu u'eawer are. ¹⁷ Amumē Janeruwarete 'ga pē nerekō tywerukat 'gā nupe mama'e esage etee pēē iapo re. "Taesak 'gā tejerowiara 'jau kwy" 'jau 'ga ojeupe. A'eramū pē nerekō tywera wesageramū 'ga upe. Maranuara ajee esage 'ga upe? Pēnemīapo tywer are 'gā pē nerekō tywera? Pēnemīapo esage are te ra'u nū? Pēnemīapo esage are 'gā pē nerekō tywera esage 'ga upe. ¹⁸ Sā'ā Kristu 'ga. Nuapoi 'ga mama'e tywera. A'etea 'gā 'ga wereko tywet 'ga jukau. Nan tee futat 'ga rerowiare'ema 'gā pē nerekō tyweretei. Jejui Kristu 'ga esage ma'ea. Naotywer are rūi 'ga manūi ikue. Ni-tywi futari mama'e tywera 'ga pype. Janetywer are te 'ga manūi janetywera mepyawamū

'Uwarete 'ga upe ikue. Namanūu'jau'jawi 'ga. Majepesi tee futat 'ga amanūmū mama'e tywera apoaramū jane katu'okawamū. Amanūmū 'ga janetywera mepyauap. Esage ma'e 'ga amanū itywet ma'eramū jane ree. 'Uwarete 'ga pyri werowiaaramū jane rerooawamū te 'ga manūi. 'Ga rerowiare'ema 'gā 'ga jukau ikue. 'Ga manū re 'ga remiayuwa 'gā amū Jejui 'ga rerawau inuga ita kwara pype. A'ere Janeruwarete 'ga 'Agesage 'ga moferawi nū. ¹⁹ Ita kwara pype 'ga ruwamū futat 'ga 'aga uēma 'ga wi. A'eramū 'ga 'aga oje'ega ae'agera upe. Ae'agera rupaw ipe awau. A'ere ae'agera nū'lēa'uweri pe awi. A'eramū Jejui 'ga awau oje'ega jupe. "Nepeenuwi Jeruwarete 'ga je'ega rakue. A'eramū nipo 'ga anure pē monou mama'eukwaawa rapyaw ipe", 'jau 'ga oje'ega jupe.

²⁰ Ymā te Janeruwarete 'ga ruagamū aeypy 'gā tywera upe rakue. Nue 'ga yaruu apo 'ga poromukuramū 'ga wuagamū 'gā tywera upe. A'ere 'gā nuerowiari futari 'ga. A'eramū 'gā osowe'em futat yaruu pype. A'eramū 'gā opapa 'y pyu rakue. Nue 'ga etee, opytuna 'gā netee awau osou jui. Ose ma'e 'gā pytuna oito etee. Oito 'gā etee osou 'y awi. A'eramū 'gā amanūme'em 'y pe. ²¹ Yara pype 'gā sea Jejui 'ga rerowiaara 'gā pymāwama resaukaawamū rakue. Sā'ā yara pype ose ma'e 'gā manūe'ema. Nan tee futat Jejui Kristu 'ga Ruwarete 'ga 'ga moferawi jane katu'okawamū. Werowiaramū Jejui Kristu 'ga jane katu'oka. A'eramū jane jarejepymāukaa 'y pe 'ga amū upe, Jejui 'ga rerowiara resaukaawamū. Najarepiky'a awi jarepireitawamū rūi jane jare-

jepymīāukaa 'y pe 'gā amū nupe. Jejui 'ga rerowiara resaukaawamū te jane jepymīukari 'y pe 'ga amū upe. 'Y pe jarejepymī enune jareje'ega Jarejuwarete 'ga upe: "Jetywera emoit je wi. Taenup eneje'ega 'jau" 'ga upe 'e re te jarejepymīāukaa 'y pe 'gā amū nupe. ²² Amanū re 'ã Jejui 'ga oferapa nū, awau ojewya 'Uwarete 'ga pyri. Peu owaēm ire 'ga reni 'Uwarete 'ga pyri, 'Uwarete 'ga jakwatawa katy. A'eramū 'gā 'ūina 'wyriaramū ywagipewara 'gā nupe. Ywagipewara 'gā nupe, 'gā 'wyriara 'gā nupe. Mīmera 'gā nupe Jejui 'ga 'ūina 'wyriaramū. 'Ga je'ega 'gā wenup pāwē pāwē ajemogyau.

4

Kristu 'ga 'jawe ki pejemogy

¹ Kristu 'ga ako wayrūnamū jane ree ikue. Amanūmū nanē nū ako 'ga janetywera mepyawamū ikue. "Najerayrūweri je 'gā nee", 'jawe'em futat 'ga rakue. A'eramū ki pēē pejejemogyau 'ga 'jawe. 'Ga mome'u are nipo 'gā amū pē nerekou tyweaete. A'ere ki pēnuag pejejereko tywera upe. Wereko tywera uag ma'e 'gā opoit nanē mama'e tywera apo awi nū. Nuapou'jawi futari 'gā mama'e tywera. ² A'eramū ki pēē mama'e apou Jarejuwarete 'ga remifutar imū etee futat, ywy pe pejejemogyau. Pejejemifutar imū pēē mama'e apou'jape'ema. ³ Ymā te 'ã mama'ea peapo pejejemifutar imū etee pejejemogyau rakue. Neperowiari wejue Jejui Kristu 'ga rakue. A'eramū pēē mama'e tywera apou pejejemogyau rakue. A'eramū pēē

pejejemirekoe'em are pejekou rakue. Kūjānamū pēē pejemene'em are pejekou. Kawīajaiwa rykua pejejemogyau. Maraka pēē iapou kawīajaiwa rykua pejejemogyau rakue. Mama'e tyweretea pēē iapou maira'me a'agaw are pejejotypawamū rakue. A'ere 'awamū nepeapou'jawi aipoa.

⁴ A'eramū 'awamū Jejui 'ga rerowiare'ema 'gā oporesagamū etee pē nee, mama'e tywera pēē iapou'jawe'emamū. A'eramū 'gā pē naykau ojepyri mama'e tywera pēē iapoe'emamū. A'eramū 'gā pē je'ēwu'jaga ekoete, pē kurapa.

⁵ A'ere nipo 'gā anure werekwawera mome'ui Jarejuwarete 'ga upe. 'Gā nerekwawera 'gā imome'u re nipo Janeruwarete 'ga 'gā mepyau ee. Wowase ae majatykaaw ipe nipo 'ga najuejue etee jane mepyau janerekwawer are. Amanū ma'efera 'gā 'ga imepyau. Imanūe'emamū nanē 'ga jane mepyau nū. Oje'ega renupara 'gā 'ga erawau imogyau ojepyri. Oje'ega renupare'ema 'gā 'ga imonou mama'eukwaawa rapyaw ipe.

⁶ Ma'eramū 'ā 'gā amū ruri Jejui 'ga mome'wau pē nupe rakue. Pēpytuna 'gā amū 'ā amanū rakue. Jejui Kristu 'ga rure'emaewe ywy pewaramū 'ā jane manūi. A'eramū pēpytuna 'gā amū amanūmū rakue. A'ere 'ā 'gā amanūme'ēwe Kristu 'ga rerowiari rakue. A'eramū 'gā awau ajemogyau Jarejuwarete 'ga pyri nakwaparimū warāu rūi futat.

Mama'ea ki peapo pejejopoaawamū

⁷ Niporomukui futari nipo Kristu 'ga 'ua. A'eramū nipo 'ga remiafopera mama'ea ateepawamū. 'Ga rerowiaaramū jane jarewau

'ga pyri. 'Ga rerowiare'ema 'gã awau mama'eukwaawa rapyaw ipe ajemogyau. Ma'eramũ 'ã je 'i pẽ nupe: Pemõi kasi mama'e tywera apo are pejejea ne. Pejemogypyyk pejejemogyau Jarejuwarete 'ga ree, je 'i pẽ nupe. Pejeje'ega monou au'jeteramũ 'ga upe mama'e are. ⁸ Pejeporomutaramũ pejejuee. Pejejuee pẽporomutara esage futat Ku'jywa 'ga upe. Pejejuee pejeporomutaramũ pẽe pejejea'are'emamũ au'jeteramũ pejejotywer are. ⁹ Pejejeupe Jejui 'ga rerowiaara 'ga amũ ruramũ pẽe 'ga mua pejejog ipe, pejejejukau esage 'ga ree, pejeku'iramũ 'ga ree. ¹⁰ Janeruwarete 'ga 'ã mama'ea wapoukat janee. Najareju'jawe etee rãi jane 'ã mama'e apoi. Amumeramũ 'ga 'ã jane mogyau moromu'jaramũ jarejaupe, mama'e are jarejamu'jaramũ. Amumera 'gã 'ga imogyau 'wyriaramũ 'gã nupe. A'eramũ ki jane mama'e apou jarejopoawamũ Jarejuwarete 'ga muorypawamũ etee futat. ¹¹ Jarejuwarete 'ga je'ega mome'waramũ pẽe 'ga je'ega etee futat imome'wau a'jea futat. 'Gã nupe mama'e esage apoaramũ pẽe mama'e apou Jarejuwarete 'ga pãjẽ mû etee futat. A'eramũ pẽ nesakara 'gã Jarejuwarete 'ga muorypa pẽ nee, pẽneko esage are. Jejui Kristu 'ga remiayuwamũ jane jemogyi. A'eramũ jane 'jau Jarejuwarete 'ga upe: "Ene te 'ã enereseage. Ene te 'ã pãjëretea. Neneteepawi futari 'ã e'ÿina", 'jau jane 'ga upe. A'jea futat jane'ea.

Pẽnuag iki mama'eay upe

¹² Pẽe 'ã jejekoty'aawaretea. A'eramũ je pẽ mueapyou pejemogy are. 'Awamũ pẽtywerete

pejejemogyau. Mama'eaya ojesaukaa pē nupe, pē nerekou tyweaete. Jejui Kristu 'ga ree pejejemogypyka pejejemogyau. A'eramū pēē 'ga ree pejejemogypyg are mama'eaya pejejeupe ijesaukaramū ki pejejemogypyka etee te pejejemogyau 'ga ree. A'eramū pēē pejepy'a'wyre'emamū pejejemogyau ee. "Ma'eramū je tejereko tywerukaa 'ga ree 'ū", 'jawe'em pēē pejejeupe.

¹³ Ymā 'ā Kristu 'ga jerekō tywerukari pē nee rakue. A'eramū pēē pejeku'iramū etee 'ga ree pejejereko tyweramū. 'Ga ree pejejereko tywerukar ire nipo pejeku'iramū anure 'ga ruramū. Najuejue etee futat jane 'ga resage resaka 'ga pājē reewe. A'eramū jane jareku'iramū 'ga ree, 'ga ruramū.

¹⁴ Pēē 'ā Kristu 'ga remiayuwa. Janeruwarete 'ga 'Agesagea 'ā pē nerekou. 'Ga 'Agesagea esage ete ma'ea. Poromū pē nerekou. A'eramū nipo 'gā amū pē kurapa 'ga ree. 'Ga 'Agesagea pē nerekoe'em ire amunipo 'ā 'gā nepē kurawa'uweri. A'ere 'ā 'ga 'Agesagea pē nerekoi. A'eramū 'gā pē kurapa. A'ere ki pēku'i etee pejekurawamū. ¹⁵ Mama'e tywera pēē iapo re 'gā pē nerekou tyweaete a'jea futat pēnemiaypofer are. 'Ga amū pēē ijuka re te amunipo 'ā 'gā pē nerekō tyweretei ee. Mama'e are pemunarū re te amunipo 'ā 'gā pē nerekō tyweretei ee. Mama'e tywera pēē iapo re te amunipo 'ā 'gā pē nerekō tyweretei. Pejejamuawapirukare'em are. Mimer are amunipo 'ā 'gā pē nerekō tyweretei a'jea futat. A'ere kasi peapo mama'e tywera ne. Mama'e tywera apo are 'gā pejejereko tyweramū nipo pejepoyje'emamū pejejemogyau. ¹⁶ A'ere kasi Kristu 'ga ree 'gā pejejereko tyweramū pejenosī ne. Naani. Pejerowiat Kristu 'ga remi-

ayuwamū pejejemogy are. “Au’jete je mogo ape Kristu ‘ga remiayuwamū”, pe’je ki Jarejuwarete ‘ga upe, ‘ga muorypa ee.

¹⁷ Owaēm futat ‘ā jarejaui Janeruwarete ‘ga jane mojo'oga upe. ‘Awamū miāmū futat ‘ga werowiaraiparamū jane rereko tyweri'i janeremiapofera tywer are, mama'e tywera apo awi jane momoirukaawamū. Anure taetu nipo ‘ga werowiare'ema 'gā nerekō tyweretei 'gā werowiare'em are, 'gā mojo'oka werowiaaramū jane wi, 'gā monou mama'eukwaawa rapyaw ipe. ¹⁸ Ymā te ‘ā Janeruwarete ‘ga ka'arana kwasiarukari Sarumāu 'ga upe rakue:

“Janeruwarete ‘ga remiayuwa ‘gā ojerekō tyweruka'ri ywag ipe o enune.

A'ere ‘ga remiayuwe'ema 'gā anure 'gā jerekō tywerukari.

Nooi futari 'gā ywag ipe.

A'eramū taetu 'gā ojerekou tyweaete ojere'emamū futat nipo”,
‘jau ‘ga ikwasiarukaa ‘ga upe rakue.

¹⁹ Wemifutar imū jane jerekō tywerukar ire Janeruwarete ‘ga ojejukau esage jane ree. 'Gā amū jarejerekō tywerauwe kasi sapoit ‘ga wi ne. A'eramū jane jarejemogypykyka ‘ga ree, jareapoarerā ‘ga ree. U'eawer imū etee futat ‘ga mama'e apoi. A'eramū ki jane mama'e apou ‘ga remifutar imū etee futat, jarejemogypykyka ‘ga ree.

5

Jejui 'ga rerowiaat

¹ ‘Awamū je Jejui ‘ga rerowiaara ‘gā 'wyriaramū pē mu'akwaapa mama'e are. Je nanē ‘ga

rerowiaara 'gā 'wyriara nū. Ymā te je Kristu 'ga rayrū resagi ikue. 'Ypeywar are 'ga manūnamū je 'ga resaka ikue. Anure nipo je Kristu 'ga ruaw esage enyfuga rupi je oi tekou 'ga pyri. A'eramū je 'jau pē nupe: Janeruwarete 'ga pē mū'ē, pē mogyau werowiaara 'gā 'wyriaramū rai'i. ² A'eramū ki pēē pejejejukau esage 'ga rerowiaara 'gā nee. Sā'ā karupa'mī are omaenun ma'e 'gā jejuka esagea weymaw are. Nan tee futat pejejuka esage Jarejuwarete 'ga remiayuwa 'gā nee. Pejeku'iramū pejejemogyau 'gā nee pejejuka esage are. Ojeupe pejeporowyky are pēku'ia Janeruwarete 'ga ifutaa. 'Gā nee pejeporowyky repy are etee kasi pēnea'ar ine. 'Gā poaawamū te ki pejejuka esage 'gā nee. ³ Pēē 'ā 'gā 'wyriara. A'ere kasi pemoywyrafen pejeje'ega 'gā nupe ne. Peko esage etee 'gā pype. A'eramū nipo 'gā ojemu'jau pē nee. ⁴ Kristu 'ga 'ūi 'wyriarareteramū werowiaaramū jane'wyriaramū. 'Ga 'ā jane rerekou weape namutat. A'eramū 'ga werowiaara 'gā nee pejejuka esageramū pē mepyau 'gā nerekō esage are, pē nerawau pē mogyau ojepyri.

⁵ 'Awamū je pē mu'akwaawi mama'e are kunumīmeramū, kūjāmukuferamū 'jau. Peenup katu katu ki iymanera 'gā je'ega. Nepekwaapawi we mama'ea. A'eramū ki pēē 'gā je'ega renupa.

'Awamū je 'i pē nupe najuejue etee futat. Pejopoaa pāwē ete nanē mama'e apo are. Pejopoar iki mama'e apo are. A'ere kasi pejerowiarai pējopoar are ne. Ymā te 'ā Janeruwarete 'ga ka'arana kwasiarukari Sarumāu 'ga upe ee rakue: "Janeruwarete 'ga imara'ne ojee tee ojerowiarai pē ma'e 'gā nee.

Nopoari futari 'ga 'gā mama'e apo are.

Ojee tee ijerowiaraiwe'ema 'gā etee te 'ga opoat mama'e apo are",

'jau 'ga ikwasiarukaa ka'aran are rakue. ⁶ A'eramū ki pēē pejejerowiaraipe'ema pejejerie. Peenup katu katu Jarejuwarete 'ga je'ega. Pājēretea 'ga. A'eramū 'ga oje'ega renupara 'gā poaa. A'eramū nipo 'ga anure pē mogyau 'wyriaramū wemifutara 'ara rupi. ⁷ Pejemuaẽm kasi mama'e are pejejeremogyau ne. Janeruwarete 'ga pē nerekō weape. A'eramū pēē pejepy'ata'waramū pejejeremogyau.

⁸ Pejea'gu ki mama'eukwaawa 'wyriar awi. Sā'ā 'miara ioa ijemi'uekara. Nan tee mama'eukwaawa 'wyriara rekoi jane rewiri jane mu'akwaawukare'ema jane rekoramū. A'eramū Jarejuwarete 'ga je'ega renuwukare'ema janee. ⁹ A'eramū ki pēē Jejui 'ga ree te futat pejejeremogypyka pejejeremogyau. Perowiat kasi mama'eukwaawa 'wyriara je'ega ne. Pēfuakar iki jupe. Pēnea'ar iki pejejerirera 'jawewara 'gā nee, Jejui 'ga rerowiaara 'gā nee. 'Gā nanē 'ā ojereko tywerukaa ajemogyau nū. 'Ga rerowiare'ema 'gā 'gā nerekou tyweaete. A'eramū 'gā ajemogyau tyweaete pē 'jawe futat. Amunawa moyka 'ga rerowiare'ema 'gā 'ga rerowiaaramū jane rerekou tyweaete. ¹⁰ A'ere nipo 'gā ināināñī etee pē nerekō tyweri pejemogyramū. A'ere nipo anure nepeko tyweru'jawi. Janeruwarete 'ga esage ma'ea. Wa'yra 'ga jane erowiaramū 'ga jane mū'jāu mama'e tywera apoara 'gā nui, jane mujaa Kristu 'ga ree jane mogyau. A'eramū nipo 'ga anure jane rerawau jane mogyau ojepyri nakwaparimū rūi. Janeruwarete 'ga te 'ā pē

mouagukaa mama'eay upe. A'eramū 'ã pẽẽ pejepoire'ema Jejui 'ga rerowiar awi, pejejeupe mama'eay jesaukaawamū. Janeruwarete 'ga etee futat pẽ mojemogypygukaa etee te Kristu 'ga ree.
11 Janeruwarete 'ga 'wyriarareteramū 'ñi janee najuejue etee. Uẽme'ema futat 'wyriaramū 'ñi awi. A'jea futat aipo 'ea.

12 Teje'ega je akwasiarukat Silasi 'ga upe ka'aran are. Natuwuu rũi je ikwasiarukari 'ga upe. Ka'aran kwasia'ria te je aapoukat 'ga upe. Silasi 'ga Jejui 'ga rerowiaararetea. A'eramū 'ga akou janerewirera 'jawewaramū. Ajemogypyk je 'ga ree tekou. A'eramū je teje'ega kwasiarukaa ka'aran are 'ga upe tejee. "Tamojemogypyk tãmẽjẽ 'gã Kristu 'ga ree 'jau kwy", 'jau je tejeupe. A'eramū je ka'arana kwasiarukaa imonou pẽ nupe, Kristu 'ga ree pẽ mojemogypygukaawamū. Janeruwarete 'ga ojejuka esage jane ree a'jea futat. A'eramū je a'e are ka'arana kwasiarukaa Silasi 'ga upe. A'eramū taetu ki pẽẽ pejejemogypyk Kristu 'ga ree.

13 Pẽnewirera 'jawewara 'gã, Papironi pewara 'gã oje'ega omono pẽ nupe, pẽ futaa. 'Gã nanẽ Janeruwarete 'ga imû'jãu imogyau wemiayuwamū nã. Jera'yra 'jawewara 'ga, Maku 'ga, nanẽ oje'ega monou pẽ nupe, pẽ futaa nã.

14 Kristu 'ga remiayuwamū pẽẽ pejejomana pejeporomutaramū pejejuee.

Afutat je Jarejuwarete 'ga Kristu 'ga remiayuwamū pẽ mopy'ata'waa.

Kweramū jeje'ega pẽ nupe.

**Janeruwarete 'Ga Je'eg
New Testament in Kayabí (BR:kyz:Kayabí)**

copyright © 2012 Wycliffe Bible Translators, Inc.

Language: Kayabí

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayabí

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 11 Nov 2022 from source files
dated 29 Jan 2022
4079b71d-584e-51a5-ad2a-7eb18ed8c7d4